

RAJU ELIISABET

Kon Sa koolin olt käünü?

Seo aastaga lõpõdi Kääpa põhikooli, kon olõ opnu kõik ütessä aastakka. Edesi lää ma ütes aastagas Argentinadõ kollõdžidõ, a peräst õkvalt Treffneri gümnaasiumidõ Tartu liinan.

Määntsit ammõtit Sul elu joosul olnu om?

Mul om viil lühküne elu, et kõnõlda ammõtiist, kuigi olõ saanu ütsjagu näüdeldä ja pilli mängi nii raha iist ku tõisi rõõmus. Kõgõ perämäne ja mu meelest ka kõgõ tähtsämb ammõt oll' võro keele iistkõnõlõja, midä võit pitä rohkõmb missioonitüüs ja tuu om joba avvauasi, ku määndselegi noorõlõ andas võimalus ja ka vastutus säänest ammõtit pitä.

Määntsest Võrumaa kotussõst Sa peri olt?

Terve uma elu olõ elänü Vahtsõliina kihlkunnan, Kühmämäe külän, a ku mu käest küsütäs, et kost ma peri olõ, siis vasta alasi, et olõ Harglõ võrukõnõ. Harglõ tuuperäst, et mu juurõ omma säääl ja tunnõ selgede, et tuu kandiga om mul määnegi köüdüs. Elust Harglõ kandin läbi aoluu kõnõlas ka mu uurmistüü ni läbi

uurmisõ jõudsõ nii hindä ku edevanõmbidõ hindätiidmine pallu lähkümbäde.

Kuimuudu ja kiä Sullõ ütöl, et Sust võru keele iistkõnõlõja saa? Kas mõtlit kah inne vai ollit õkva peri?

Tuu oll' määnegi koolipäiv joba sügüse, ku mullõ tetti Võru Instituudist ettepanõk, et ma võinu võru kiilt iist kõnõlõda. Ma olli õkvalt nõun, selle et tuus aos olli ma joba paar artiklit kirutanu tuust, et ku mi taha umma kiilt ja kultuuri elun hoita, olkõ taa sis kiräkiil vai võru kiil, piämi kõkkõ taad tegemä ütenkuun nuuriga. Muidu



saavaki stereotüübi (*a la* võru kiil om õnnõ vannu inemiisi kiil) karmis reaalsusõs.

Kas võru keele iist kõnõlõminõ oll' rassõ?

Iist kõnõlda olõ-õi rassõ, ku esi julgut ja mõistat kõnõlda, selle et sõs kõnõlõsõ tõsõ ka perrä. Mu missioonis oll' jõuda rohkõmb noorilõ lähkümbäle, tuuperäst lei pallu sissu nii Facebookin ku noorilõ esiki tutvamban meediäkanalin Instagramin. Ma kirudi uma lõpukõnnõ võru keelen. Kõgõ inämb miildüs mullõ võru kiilt opada põhast tulnuilõ sõbrulõ. Ma arva, et iistkõnõlõminõ saa avita õnnõ sõs, ku mi võta iist ja teemi ka reklaami. Üts asi, midä tulõvigun tahtnu kimmähe viil tetä, om võrukiilne *podcast* (karmanihelü), midä võinu tetä ütenkuun võrukõisist sõpruga ja stuudiodõ küllä kutsu egäsugutsit põnõvit Võrumaa inemiisi vai Võrumaaga kuigimuudu köüdetüisi inemiisi.